

07 FEB 2003

Mahathir-Islam (Bergambar)

M'SIA BERJAYA PRAKTIK AJARAN ISLAM DENGAN TERTIB, KATA DR MAHATHIR

PUTRAJAYA, 7 Feb (Bernama) -- Malaysia berjaya mempraktikkan ajaran Islam dengan tersusun dan tertib sesuai dengan keadaan zaman, kata Datuk Seri Dr Mahathir Mohamad.

Perdana Menteri berkata Malaysia juga telah berjaya mengadakan perbankan Islam, takaful dan pentadbiran yang memiliki nilai-nilai Islam.

Katanya undang-undang awam juga dikaji dan diubahsuai supaya tidak bercanggah dengan ajaran Islam, terutama daripada segi menentukan keadilan.

"Demikianlah berjayanya penerapan Islam sebagai cara hidup kita di Malaysia sehingga banyak negara Islam lain mendakwa Malaysia adalah negara Islam contoh dan mereka sering menghantar rombongan untuk mempelajari cara-cara kita," katanya ketika melancarkan e-Syariah di sini, hari ini.

e-Syariah adalah projek kerajaan elektronik yang ketujuh di bawah aplikasi perdana Koridor Raya Multimedia. Ia merupakan satu sistem pengurusan kes bersepadu yang mengintegrasikan semua proses yang terlibat di dalam pengendalian kes-kes mahkamah syariah.

Dr Mahathir berkata dalam masa yang sama, kaum lain tidak tersinggung atau berasa tertekan kerana penerapan nilai dan ajaran Islam yang dilakukan.

"Ini adalah kerana kita tidak mengada-ngada (keterlaluan) sehingga hendak di-Islamkan segalanya yang tidak mungkin di-Islamkan.

"Ada yang percaya bahawa warna tertentu lebih Islam daripada warna lain, pakaian tertentu adalah Islam dan seterusnya," katanya.

Dr Mahathir berkata kita anggap bahawa Islam adalah agama bagi semua masa dan zaman dan tidak bagi abad ketujuh, 1,400 tahun dahulu sahaja.

"Mencuba mengembalikan keadaan 1,400 tahun dahulu untuk mengembalikan kebesaran Islam sebenarnya menghina agama sebagai agama yang hanya mampu berjaya di zaman kuno.

"Kita perlu buktikan bahawa dalam apa juga zaman, keadaan dan persekitaran, Islam tetap sama dan berkemampuan untuk menjadi agama yang sesuai yang mampu mendirikan tamadun yang gemilang," katanya.

Dr Mahathir berkata perlu diakui bahawa ada orang Islam di Malaysia tidak begitu senang hati dengan pentadbiran undang-undang Islam di negara ini.

"Ini menjadi lebih tidak memuaskan memandangkan Malaysia adalah satu-satunya negara Islam yang mempunyai undang-undang Islam yang tersusun dan jelas yang menterjemahkan kehendak agama Islam berkenaan dengan keadilan dan pengadilan," katanya.

Menurutnya di Malaysia, pelaksanaan hukum Islam tidak bergantung kepada tafsiran bersendirian hakim akan kekendak Islam dan hukum yang diwajibkan.

"Kita pernah melihat hakim di negara Islam lain yang menghukum wanita yang dipercayai telah berzina dengan hukuman supaya dia dirogol beberapa lelaki. Kita juga pernah mendengar orang Islam yang membunuh sendiri adik perempuan kerana berkawan lelaki bukan Islam," katanya.

Selain perbuatan dan penghakiman mengikut fahaman sendiri, katanya ini memberi gambaran yang amat buruk terhadap agama Islam dan orang Islam dan ia juga sebenarnya bukan daripada ajaran agama Islam.

Perdana Menteri berkata oleh kerana ada orang yang beragama Islam yang sanggup melakukan kezaliman dan menidakkan keadilan, kononya kerana itu adalah ajaran Islam, maka imej yang buruk terpalit kepada agama Islam.

"Dan musuh-musuh Islam pun mengambil kesempatan untuk memburuk-burukkan lagi agama Islam supaya agama suci ini ditolak oleh orang bukan Islam.

"Hari ini orang Islam dan agama Islam begitu dihina bukan kerana agama Islam tidak baik tetapi kerana telatah dan kelakuan orang Islam yang tidak menghiraukan ajaran Islam yang sebenar," kata beliau.

Dr Mahathir berkata di negara ini, kerajaan amat sedar akan kelemahan manusia apabila menghakimkan sesuatu.

"Sebab itu undang-undang Islam dikanunkan. Undang-undang lain juga dikanunkan supaya tidak ada percanggahan undang-undang lain daripada segi prinsip dan asas undang-undang Islam," katanya.

Dr Mahathir berkata menghukum mangsa jenayah dan melepaskan penjenayah adalah tidak adil dalam Islam seperti juga tidak adil dalam apa-apa undang-undang lain.

"Pengadilan bermakna mencari keadilan iaitu hasil daripada proses pengadilan ialah keadilan dan bukan pematuhan kepada proses sehingga berlaku ketidakadilan," katanya.

Perdana Menteri berkata kerana ingin melihat keadilan berlaku, maka hakim dibebaskan daripada tekanan terhadapnya, baik oleh kerajaan dan mana-mana pihak.

"Tetapi hakim tidak boleh ditegur dan sukar diambil tindakan pembetulan, tidak bermakna hakim boleh mengetepikan kepentingan pengadilan yang adil semata-mata kerana bebas daripada teguran dan tindakan.

"Jika hakim menyimpang jauh daripada pengadilan yang adil, kerana menganggap dirinya bebas, maka institusi penghakiman tentulah akan hilang kepercayaan masyarakat selain daripada hakim berkenaan tidak akan diberi kepercayaan," katanya.

Mengenai E-Syariah, beliau berkata ia bertujuan memastikan pentadbiran hal ehwal Islam terus dilengkapi dengan peralatan terkini untuk menjadikannya jentera dan organisasi yang mampu menangani cabaran dan harapan baru.

"Dalam hubungan ini aplikasi E-Syariah merupakan satu-satunya perisian aplikasi mahkamah syariah yang terbukti mampu dibina oleh anak tempatan tanpa memerlukan kepakaran luar negara," katanya.

Dr Mahathir berkata jika kerana peralatan moden seperti Teknologi Maklumat Dan Komunikasi (ICT) dikatakan berlakunya keruntuhan akhlak dan kepincangan dalam masyarakat manusia termasuk yang beragama Islam, sebabnya bukanlah kerana alat-alat itu tetapi kerana sifat yang tidak baik yang ada pada manusia.

"Sebilah pisau boleh mengukir sesuatu yang cantik tetapi pisau yang sama boleh juga membunuh, yang salah bukan pisau tetapi manusia yang menggunakannya," katanya.

-- BERNAMA

RV MUN HS NAK